

Confessar ei buca sempel

Igl ei stau la balla

Tomas va buca bugen a letg. Mintga sera ha el in'otra stgisa. Treis gadas sto la mumma dir: „Tomas, igl ei temps.“ Per lu va el a letg. Oz eis ei auter. Gest suenter tscheina di el: „Puh, jeu sun staunchels oz. Jeu mondel uss a letg.“

Bab e mumma sesmarveglian. Quei ei lu ina raritad, che Tomas va a letg voluntariamein!

Ei va buca ditg che Tomas schai en letg. El siara ils egls e vul durmir. Denton ei gartegia buc. Incuntin sevolva el d'ina vart a l'otra.

Bab e mumma sesmarveglian aunc adina.

„Il buob vegn bein buc ad esser malsauns?“ manegia il bab. „Sche va pia aunc ina gada en sia combra a dar in'egliada.“

Discusamein arva la mumma igl esch. Tomas siara pli fetg ils egls ed ei tut quiets. La mumma senta denton ch'el dierma buca. El zicla vid sia ureglia. Cheu sesaulza Tomas.

„Vulas ti buca dir a mi, daco che ti eis ius aschi baul a letg?“ damonda la mumma.

„Cheu dat ei atgnamein nuot da raquintar“, rispunda Tomas. „Jeu erel anson propi staunchels. Quei vegn segir dil dar ballapei.“

„Aschia“, surri la mumma, „dil dar ballapei. Lu ei vossa balla segiramein sgulada ella finiastra, buc?“

Surstaus mira Tomas silla mumma.

„Danunder sas ti quei? Ha enzatgi tradiu nus?“

„Jeu haiel saviu imaginar“, rispunda la mumma. „Ei sto dar in motiv che ti eis ius talmein baul a letg.“

„Jeu sun leds che ti sas ussa ei“, di Tomas. „Jeu savevel gnanc durmir. Damaun prendel jeu raps ord mia cassa e cumprel in niev veider da finiastra.“

„Quei ei bi da tei“, di la mumma. „Ins sto far bien il donn ch'ins caschuna. Ed ussa eis ei temps che ti diermies.“

Strusch ei la mumma ida, surri Tomas cuntentamein e dierma prest franc e bein.